

## Transkription von Urkunde HRO 1390a

Ort, Datierung: Rostock, 1390-11-02

Signatur: Stadtarchiv Rostock, U 630 U 630 Kloster Marienehe 1390 November 2 [\[online\]](#)

Inhalt: Lyppold Holste: Schuldbrief

---

Jk lyppold holste knape be kenne vnd(e) betūghe openbare jn dessen breue . vor allen guden lūden / de ene zeen eft hōren lezen dat ik myt mynen rechten ernamen van rechter schult schuldich / byn deme be scheydene manne hern wynnold bagghelen Raetman to rozstoke vnde synten rechten / ernamen vertich marc lūbescher pe(n)ni(n)ghe vor dyt vorbenūmede ghelt zo zette ik eme / to enen brūcliken pande dat zulue gud dat ik myt mynen wyue nam dat beleggen is to / retze myt alle syne(n) thobehoringhen , alsūlk also ik dat dar hebbe vnd(e) ik vnd(e) myn ernamen / mōghe(n) dat zulue gud wedder lōzen bynnen dren jaren also nū neghest to kompt to sūnte / mertens daghe vort ouer dren jaren also vor vertich m(a)r(c) lub(esch) . were dat ik des nicht / en lōzede bynnen desser tyt also vorscreuen is so schal dat zulue vorben(omede) gud hern wy/nold bagghelen rechte eweghe kofte kop wesen vnd(e) syner rechten ernamen vnd(e) ik lyppolt / vorben(omet) myt mynen ernamen scholen eme des vorben(omeden) gudes waren vor alle ansprake / gheistlik vnd(e) werlik vor alle de(n) jenen de vor recht komen willen recht gheuen vn(de) neme(n) / willen vnd(e) schal eme dat gud vor laten vor den heren des landes wen hern wynnold / edder syne ernamen des van my edder van mynen ernamen be gherende synt dat / rede vn(de) loue ik lyppold holste myt mynen ernamen deme vorben(omeden) hern wynnold bagghelen / vn(de) synten rechten ernamen in guden trūwen stede vnd(e) vast to holdende zunder claghe / vortoch vnd(e) jengherleye argelist to mereren be kantsnisse des hebbe ik lyppold holste / myn jnghezeghel ghehenghet an dessen bref vnd(e) tho tūghe so hebben desse guden lude / also clawes kerktorp knape hinrik Constyn vnd(e) hans korte ere jnghezeghele myt my / ghehenghet an dessen de gheuen js to rozstok na godes bort drūtteynhundert jar jn / de(m) negentichsten iare des myddeweken na alle godes hilghen daghe /